



Helsinški Parlament Građana (hCa) Tuzla  
 Helsinki Citizens' Assembly (hCa) Tuzla  
 Omladinski resursni centar Tuzla  
 Youth Resource Center Tuzla  
 Hadži Bakirbega Tuzlića 1, 75000 Tuzla,  
 Bosna i Hercegovina  
 Tel/fax: ++387 35 258 077  
 e-mail: hcatuzla@bih.net.ba, orctuzla@bih.net.ba  
 www.omladina-bih.net



## Hronika 6 – Nasilje u školama u BiH

**“Sramotni snimak šokirao tuzlansku javnost: Izvele učenicu iz škole, sjekle joj kosu, a potom brutalno pretukle!”** – **“Intezivan porast vršnjačkog nasilja”** – **“Facebook rasprava uzrok incidenta između učenica u Tuzli?”** – **“Tuzla u šoku: Pretukle školsku drugaricu, a snimak surovog maltretiranja objavile na internet.”** – **“Nasilje u Lukavcu: Učenika Elektro-mašinske škole mjesecima maltretirali, tukli i pljačkali”** – **“Zabrinjavajući rezultati istraživanja o nasilju: 70 posto djece i mladih se plaši da prijavi nasilje”** – **“Nasilje u bh. školama: Šokira brutalnost tinejdžera”** – **“Federacija nemoćna da suzbije porast maloljetničkog kriminala u Bosni”** – **“Više od 1.000 maloljetnika u BiH ima policijski dosje.”**<sup>1</sup>

Da li je maloljetničko, vršnjačko nasilje, i nasilje u školama u Bosni i Hercegovini u porastu? Ili se samo radi o porastu vidljivosti takvog nasilja i trendu objavljivanja video klipova na društvenim mrežama? Gdje su uzroci porasta nasilja u školama: u nedostatku roditeljskog odgoja, nedostatku zakona o maloljetničkoj delikvenciji i/ili neprovođenju istih, nedovoljnom i neudukovanom stručnom kadru u školama, nedostatku mehanizama prevencije maloljetničkog i nasilja u školama. Ili uzroci leže u teškoj socijalno-ekonomskoj situaciji u kojoj se nalaze svi građani Bosne i Hercegovine? Kako se i čime bh društvo, a prije svega relevantne prosvjetne i pedagoške institucije mogu preventivno boriti protiv ove pojave, koja u posljednje vrijeme uzima maha i značajno utiče na indeks ljudske sigurnosti u BiH?

Ovim pitanjima, kao i potencijalnim odgovorima na njih smo se bavili u posljednjih nekoliko mjeseci. Pokušali smo prikupiti što je više moguće informacija o ovom problemu. Putem društvenih mreža smo sproveli anketu – intervju sa 45 ispitanika. Pregledali smo dosadašnja novinarska istraživanja, te istraživanja nekih nevladinih i međunarodnih institucija<sup>2</sup> o ovom problemu. I pored velikog broja prikupljenih materijala i analiza ova hronika neće moći dati odgovore na postavljena pitanja, ali

<sup>1</sup> Ovo su samo neki od naslova koji se u posljednjih nekoliko mjeseci pojavljuju na naslovnicama BH dnevnih novina i internet portala.

<sup>2</sup> Istraživanje World vision BiH, u okviru projekta „Zaštita djece“, više na: <http://tuzla.danas.info/2013/11/14/zabrinjavajuci-rezultati-istrazivanja-o-nasilju-70-posto-djece-i-mladih-se-plasi-da-prijavi-nasilje/>



THIS PROJECT IS FUNDED BY THE EUROPEAN UNION

The views expressed in this publication do not necessarily reflect the views of the European Commission



može poslužiti kao polazna tačka istraživanju o nasilju u školama koje, u saradnji sa ekspertima Centra za omladinski razvoj PRONI Brčko<sup>3</sup> namjeravamo na području Posavske Županije (Orašje), Tuzlanskog kantona (Tuzla), Sjeveroistočne Republike Srpske (Bijeljina) i Brčko Distrikta BiH uraditi u narednom periodu.

### **Intezivan porast vršnjačkog nasilja**

Slike i scene međuvršnjačkog nasilja sve češće mogu da se vide na internetu. Vijesti o nasilju i brutalnosti maloljetnika stižu svakodnevno sa ulica i kafića, ali najalarmantnije su one koje dolaze iz škola. Danas smo svjedoci intezivnog porasta vršnjačkog nasilja, što nas upućuje da se nedovoljno posvećuje pažnje u suzbijanju ovog prioritarnog problema. Govoreći o vršnjačkom nasilju, uglavnom se fokusiramo na zlostavljanu djecu. Ali ko su zlostavljači? Prevencija počinje kod kuće, preko škole i cjelokupne socijalne sredine. Vršnjačko nasilje, u fizičkom i internetskom smislu, goruća je tema posljednjih godina.

Zlostavljanje i nasilje koje uzrokuju fizičke i emocionalne ozljede, a u ekstremnim slučajevima dovode i do samoubistva, mora ostati važna tema koja će pokrenuti značajne korake u rješavanju ovog problema. Djecu treba ohrabrivati kako bi se naučila suprotstaviti nasilju i prijaviti ga. Također ih treba odgajati tako da sami ne postanu nasilnici. Nasilnici nisu likovi iz crtića, ni zlikovci. Oni su također djeca kojoj treba pomoć stručnjaka ili druge adekvatne metode koje će doprinijeti rješavanju šireg problema vršnjačkog nasilja.<sup>4</sup>

### **Zabrinjavajući rezultati istraživanja o nasilju: 70 posto djece i mladih se plaši da prijavi nasilje**

U okviru projekta "Zaštita djece", World Vision Bosne i Hercegovine je organizirao višemjesečno istraživanje o nasilju nad djecom i mladima u općinama Sapna, Kalesija i Zvornik. Ove općine dio su World Visionovog razvojnog područja Majevisa, a istraživanje je proveo lokalni Odbor djece i omladine.

Istraživanje o nasilju nad djecom i mladima, u kojem je učestvovalo 336 ispitanika/ca starosne dobi od 12 do 18 godina, pokazalo je da je procenat neprepoznavanja nasilnih oblika ponašanja u ovim općinama zabrinjavajuće visok. Provedeno istraživanje je otkrilo sljedeće:

- 67% ispitanice djece i mladih ne prepoznaje guranje kao nasilno ponašanje;
- 64% ispitanice djece i mladih neprijatno dodirivanje ne vidi kao nasilno i štetno ponašanje;
- 64% ispitanice djece i mladih ne prepoznaje nasilje putem interneta kao štetno ponašanje;
- Svaka sedma ispitanica osoba je nekoliko puta mjesečno imala iskustvo sa fizičkim dodirivanjem na način koji im je bio neprijatan;
- Oblici nasilnog ponašanja koje djeca i mladi ne prepoznaju kao štetno također su: uskraćivanje hrane, ogovaranja, izlaganje neprimjerenim sadržajima, te potkradanje ili otimanje stvari.

<sup>3</sup> <http://www.pronibrcko.ba>

<sup>4</sup> <http://tuzla.danas.info/2013/11/04/sramotni-snimak-sokirao-tuzlansku-javnost-izvele-ucenicu-iz-skole-siekle-joj-kosu-a-potom-brutalno-pretukle/>



**THIS PROJECT IS FUNDED BY THE EUROPEAN UNION**

The views expressed in this publication do not necessarily reflect the views of the European Commission



- 18% dječaka i 12% djevojčica nisu se nikome požalili kada se prema njima ponaša na način koji im je neprijatan ili čini da se osjećaju loše;
- 70% djece i mladih se plaši da prijavi nasilje.

Navedeni rezultati samo su jedan dio istraživanja koje je proveo Odbor djece i mladih, uz stručnu podršku uposlenika World Visiona i vođe istraživačkog tima dr. sci. Hariza Šarića, akademskog stručnjaka iz oblasti istraživanja nasilja nad djecom i socijalnog rada.<sup>5</sup>

### **Nasilje u bh. školama: Šokira brutalnost tinejdžera (DW/Autorka: Aleksandra Slavnić)**

Nebriga o mentalnom zdravlju mladih, nekompetentni profesori i država koja ne pruža osjećaj sigurnosti, uzrok su nasilja. Bh. građani mogu biti sretni što scene nasilja, poput onog u Tuzli, nisu češće, kažu stručnjaci.

Oko 24 odsto mladića u BiH učestvovalo je u tuči s noževima, pokazuju rezultati istraživanja nevladine organizacije "Perpetum mobile". Psiholog Srđan Dušanić, koji je radio na istraživanjima kaže da je u posljednjih deset godina porastao broj djevojaka koje su nasilne i da ga tuzlanski incident nije mnogo iznenadio. „Nasilje među vršnjacima nije nikakva novost, ono što mene uvijek šokira jeste brutalnost tinejdžera koju vidimo na tim snimcima svaki put kada oni izađu u javnost“, kaže Dušanić. Nije iznenađen ni Vanja Jošić, banjalučki srednjoškolac, koji je scene nasilja u školama više puta uživo gledao. "Ružno je reći, ali bio sam svjedok i gledao kako učenici tuku i maltretiraju druge đake".

#### **"Nastavnici su nekompetentni"**

Zdravstveni sistem u BiH bavi se samo gašenjem požara i bolestima fizičke prirode. Mentalno zdravlje stanovništva je potpuno zapostavljeno, smatra profesorka na odsjeku za psihologiju Filozofskog fakulteta u Banjaluci, Ivana Zečević. "Pored toga, nastavnici i profesori koji treba da prepoznaju neadekvatno ponašanje nisu kompetentni, nemaju vještine. Bave se samo obrazovanjem ali ne i vaspitanjem, niko ih tome nije naučio. Nije dovoljno imati dobre namjere i intuiciju kada radite s mladima tog uzrasta. Možemo biti zahvalni što se naši učenici češće ne pojavljuju u medijima s ovakvim ispadima", kaže Zečevićeva.

Iz banjalučke elektro-tehničke škole vjeruju da nastavno osoblje jeste obučeno i može adekvatno odgovoriti svim izazovima. Školski psiholog Irena Spasojević kao primjer ličnog usavršavanja nastavnika navodi samo projekte nevladinih organizacija: "Sarađujemo s nevladinim organizacijama, nastavnici pohađaju brojne radionice, seminare, kako bi bili bolje edukovani o ovim pojavama".

Projekti nevladinih organizacija su, čini se, jedini pokušaj prevencije nasilja u školama. Jedna od njih, "Perpetum mobile" iz Banjaluke šest godina radi s učenicima i nastavnim osobljem na sprječavanju nasilja. Riječ je o modelima vršnjačke edukacije koji u svijetu pokazuju odlične rezultate, kaže koordinator projekta Saša Ostojić. "Cilj je da naš program uđe u formalno obrazovanje, da se profesori i psiholozi obuče interaktivnim tehnikama, gdje su učenici sami nosioci promjena".

<sup>5</sup> <http://tuzla.danas.info/2013/11/14/zabrinjavajuci-rezultati-istrazivanja-o-nasilju-70-posto-djece-i-mladih-se-plasi-da-prijavi-nasilje/>



THIS PROJECT IS FUNDED BY THE EUROPEAN UNION

The views expressed in this publication do not necessarily reflect the views of the European Commission



Nesib Hasanović, direktor Mješovite srednje škole Tuzla, rekao je za DW da je pomenuti snimak nasilja bacio veliku ljagu na ovu školu i da su mediji oko svega digli preveliku prašinu. “Nasilje se nije desilo unutar škole, ali mene stalno zovu novinari. Ovo je pravi linč”.

### **“Ovo je vapaj mladih jer niko o njima ne brine”**

Ivana Zečević smatra da prosvjetni radnici ne mogu biti oslobođeno odgovornosti samo zato što se konkretno nasilje dogodi van školskog dvorišta. Zakazali su, ističe, svi u lancu. “Postavljam pitanje koliko učenici imaju povjerenja u nastavnike. Ovo je vapaj srednjoškolaca. Čak i ovih djevojaka koje su u ulozi nasilnika. Možda maltretiraju nekog jer su i same maltretirane na nekoj drugoj strani”.

Najbolji lijek protiv nasilja jeste prevencija i kontinuiran rad stručnjaka s mladima. Međutim, za programe prevenciju nikada nema novca. “U svim našim istraživanjima smo došli do podataka da oni koji vrše nasilje imaju nisko samopoštovanje, frustrirani su i uglavnom su proživjeli neprijatne stvari. Kada bi se s tim tinejdžerima više radilo, oni ne bi postajali nasilnici”, smatra Srđan Dušanić.

### **Ćuti i trpi...**

Iznenaduje to koliko žrtve kao i posmatrači nasilja ćute i nikom ne prijavljuju zlostavljanje. Irena Spasojević smatra da Bh. građani čvrsto vjeruju u onu staru “ćuti i trpi”. “Kulturološki smo usmjereni na mazohizam, ako ćutimo i trpimo mislimo da smo kvalitetniji ljudi”. Učenik Vanja Jošić kaže da su samo rijetki učenici na strani žrtve, koji su spremni da pomognu i da se pobune. “Nažalost, većina ne osuđuje nasilje, ne žele da se miješaju i kažu da to nije njihova stvar”.

### **Nasilje je sastavni dio života u BiH**

Ivana Zečević tvrdi da veliku odgovornost snosi država, odnosno sistem koji ne postoji i ne štiti svoje građane. Adolescentima je to jasna poruka da se mogu ponašati nasilno i provući se bez kazne, smatra ona. Neizostavan faktor su i roditelji, ambijent u kojem se odrasta, gdje su nasilje i traume sastavni dio života, prošlosti i sadašnjosti. “Najčešći vid roditeljske kazne jeste nasilno ponašanje prema djetetu, batine, uvrede, ignorisanje, psihološko nasilje. Dijete u BiH neminovno odrasta u miljeu nasilja. Da ne pričam o tome kako s koljena na koljeno prenosimo traume mnogo većih nasilnih oblika ponašanja kao što su ratovi”. Prema njenim riječima, problem bi trebalo početi rješavati s vrha. Iako je doktor psiholoških nauka, vjeruje da briga za mentalno zdravlje pojedinca sama po sebi ne obećava dobre rezultate, bez stabilnog državnog sistema koji diktira sistem vrijednosti.<sup>6</sup>

### **Teško rješiva maloljetnička delikvencija**

#### **Država Bosna i Hercegovina nema jedinstvenu i sistemsku strategiju borbe protiv maloljetničkog nasilja.**

Maloljetnička delikvencija u Bosni i Hercegovini sve je veći problem. Osim nedovoljnih mjera prevencije, poseban problem predstavlja manjak ustanova za smještaj maloljetnih prestupnika.

<sup>6</sup> <http://tuzla.danas.info/2013/11/11/nasilje-u-bh-skolama-sokira-brutalnost-tinejdzera/>



THIS PROJECT IS FUNDED BY THE EUROPEAN UNION

The views expressed in this publication do not necessarily reflect the views of the European Commission



U posljednje vrijeme sve češće se predlaže primjena alternativnih mjera u odnosu na dosadašnja rješenja u oblasti maloljetničkog prestupništva, izvještava novinar Al Jazeera **Sanel Kajan**.

Država nema jedinstvenu i sistemsku strategiju borbe protiv maloljetničkog nasilja. Ne postoje adekvatne institucije, ali ni odgovarajući programi koji bi na savremen način uključivali i neke novije, humanije i alternativnije oblike resocijalizacije maloljetnih prestupnika.

U policiji kažu da su brojni prekršaji i krivična djela koje čine upravo maloljetnici. Srećko Bošnjak iz Ministarstva unutrašnjih poslova (MUP) Hercegovačko-neretvanskog kantona (HNK) je rekao: "Kad su u pitanju izvršenja kaznenih djela, paleta njihovog interesa je zaista velika. Od uživanja pa do omogućavanja uživanja i preprodaje narkotičkih sredstava, imovinsko-kaznenih djela, provaljivanja u vozila, provaljivanja u stanove, krađa, džepnih krađa..."

Nakon što policija, tužilaštvo i sud urade svoj dio posla, ostaje pitanje gdje s osuđenim.

### **Jedinstvena ustanova**

Vaspitno-popravni dom za maloljetne prestupnike u Stocu bio je jedina ustanova takve vrste u Bosni i Hercegovini.

"Veliki paviljoni, spavaonice, ambulanta, učionice, kino i koncertna sala, radionice, bazen, sportski tereni... dio je infrastrukture koju je sadržavao ovaj dom. Danas su od svega ostali samo zidovi", izvijestio je Kajan.

Cilj kažnjavanja je popravljavanje, a ne ponižavanje ličnosti djeteta, kažu stručnjaci za maloljetničku delikvenciju.

Bivši načelnik službe za prevaspitavanje ovog doma Mehmed Dizdar je kazao: "Maloljetnici, koji bi bili jedni od onih koji ne bi imali načina da dođu do zanata, odnosno svog hljeba, ovdje bi završili zanat. Mi imamo mnogo primjera bivših štitićenika ove ustanove koji su postali čestiti i značajni ljudi. Znam da su iz Ministarstva pravde dolazili ovdje i nudili da se ponovo aktivira vaspitno-popravni dom, ali ovdašnje vlasti su to odbile."

Kao podrška programima za prevenciju nasilja, studija Ujedinjenih nadora (UN) ističe upotrebu nenasilnih strategija.

To znači usvojiti disciplinske mjere koje nisu zasnovane na strahu, prijetnjama, poniženju ili fizičkoj prisili.

### **Profesori i škola**

Preporučuje se policijsko upozorenje, naknada štete, redovno pohađanje nastave, rad u korist lokalne zajednice ili humanitarne organizacije te psihološko ili drugo savjetovanje.

Škola je jedno od glavnih okruženja u kojem je prisutna maloljetnička delikvencija. Najvažnije je prepoznati početak neprihvatljivog ponašanja djeteta i odmah reagirati. Direktor Gimnazije Mostar Bakir Krpo je kazao: "Mislim da su profesori i škola u prvom planu. Škola je najodgovornija, jer je na neki način ona suproizvođač maloljetničke delikvencije. Zato naši profesori, čitav kolektiv, najviše pažnje poklanjaju odgojnoj komponenti."



**THIS PROJECT IS FUNDED BY THE EUROPEAN UNION**

The views expressed in this publication do not necessarily reflect the views of the European Commission



Psiholozi napominju da ako nasilno ponašanje ne prepoznamo na vrijeme, ako problem zanemare i porodica i škola, čekajući da ga neko drugi riješi, onda se takvo ponašanje, zapravo, podstiče.


"Za rješavanje svakog problema najbitniji je dijalog. I preventivno se organizirati. Dijalog rješava sve", ocijenila je profesorica psihologije Azra Bubić.

Sve dok nadležni jasno ne uoče neminovnu uvezanost zakonodavstva, prevencije, alternativnih mjera te primjene zakona u praksi, teško se može govoriti o sistemskom rješavanju problema.<sup>7</sup>

### **Primjeri:**

#### **Sramotni snimak šokirao tuzlansku javnost: Izvele učenicu iz škole, sjekle joj kosu, a potom brutalno pretukle!**

Na redakcijski mail portala Danas.info stigao je video snimak u kojem su glavne akterice učenice Mješovite srednje škole u Tuzli. Na snimku se vidi kako djevojke nakon kraće prepirke izvode jednu učenicu iz škole, a potom je iza obližnje zgrade brutalno pretuku.



Nakon što su je izvele iz škole u jednom trenutku jedna od učenica makazama je odsjekla kosu žrtvi, a zatim su njih tri fizički nasrnule na nju.

Nakon što su je oborile na zemlju udarale su je nogama. Incident je posmatrala grupa učenika od kojih su pojedini sve i snimali mobilnim telefonima.

Kako je potvrđeno za Danas.info u MUP-u TK, službenici policije su

zaprimili pomenuti video snimak i poduzeti će potrebne mjere koje su njihovoj nadležnosti.

"Od uposlenika obezbjeđenja Mješovite srednje škole u Tuzli u petak, 1. oktobra, službenici PS Zapad zaprimili su prijavu da je 16-godišnjakinja, učenica prvog razreda ove škole, fizički napadnuta od strane tri maloljetne učenice. Policijska patrola je izašla na mjesto događaja i obavila razgovor sa 16-godišnjakinjom u prisustvu pedagoga škole. S obzirom da se radi o maloljetnim licima, učenice koje su učestvovala u incidentu pozvane su da se zajedno sa roditeljima jave na razgovor u službene prostorije MUP-a TK", izjavio je za Danas.info, glasnogovornik MUP-a TK Izudin Šarić.<sup>8</sup>

<sup>7</sup> <http://balkans.aljazeera.net/vijesti/tesko-rjesiva-maloljetnicka-delikvencija>

<sup>8</sup> [http://www.svet.rs/hronika/tuzla-u-soku-pretukle-skolsku-drugaricu-a-snimak-surovog-maltretiranja-objavile-na-internetu?utm\\_source=twitterfeed&utm\\_medium=twitter&fb\\_source=message](http://www.svet.rs/hronika/tuzla-u-soku-pretukle-skolsku-drugaricu-a-snimak-surovog-maltretiranja-objavile-na-internetu?utm_source=twitterfeed&utm_medium=twitter&fb_source=message)



THIS PROJECT IS FUNDED BY THE EUROPEAN UNION

The views expressed in this publication do not necessarily reflect the views of the European Commission



## **Nasilje u Lukavcu: Učenika Elektro-mašinske škole mjesecima maltretirali, tukli i pljačkali**

U posljednjih nekoliko dana svi smo svjedoci strašnih verbalnih i fizičkih vršnjačkih napada na maloljetne učenike po školama.

Posljednji nemili događaj zabilježen u Ekonomsko-hemijskoj školi Tuzla, ponukao je i druge koji trpe zlostavljanja da otvoreno progovore i kažu „Stop nasilju“.

Slučaj vršnjačkog nasilja zabilježen je i u Lukavačkoj Elektro-mašinskoj školi, u kojoj je učenik E.H. od početka školske godine učestalo bio izložen maltretiranju od strane svojih kolega A.N., E.I. i B.G.

Dječaku su redovno od strane tri maloljetnika nanasene tjelesne ozljede i otiman novac uz prijetnje da ne smije prijaviti ovaj slučaj. Kako ističe dječak, za napade nije bilo nikakvih povoda a novac je morao skrivati u patike. Svakodnevno maltretiranje je trajalo od početka školske godine do prije nekoliko dana.

*- Učenik je slučaj na nagovor svoje razrednice prijavio u četvrtak, 7.11. iako smo imali takva saznanja i ranije!? Učenik je vidno prepadnut i uznemiren opisao tok događaja i šta mu se dešavalo. Mi smo razgovarali, pokušali da ga smirimo i zamolili da nema potrebe za strahom i da prvo upozna roditelje o tome ili zajedno dođu u školu na razgovor. Tek nakon toga, roditelji su prijavili slučaj policiji a mi smo prije nekoliko dana dobili i službenu-pisanu izjavu učenika u kojoj govori o događaju i pominje imena zlostavljača.*

*Tek sada možemo preduzeti aktivnosti u vezi ovog slučaja a nastavno vijeće će u toku ove sedmice da se očituje o ovom događaju. Izjavio je Admir Hrnčić, zamjenik direktora škole.*

Slučaj Elektro-mašinske škole prijavljen je PU Lukavac, čiji će službenici u narednom periodu poduzeti sve potrebne mjere sa zakonom na rasvjetljavanju ovog nemilog događaja.<sup>9</sup>

## **Maloljetničko nasilje: Djevojku ubo nožem u vrat zbog mobitela?**

**Sedamnaestogodišnju Midhetu Đ. iz Starog Viteza u utorak popodne napao je nožem i pokušao opljačkati 15-godišnji prosjak A. N. nastanjen u naselju Sofe kod Viteza. Istog dana u mjestu Zlatne Vode kod Zvornika 14-godišnji A. D. brutalno je pretukao godinu mlađu djevojčicu A. B.**

### **Nađen nož**

Prema nezvaničnim informacijama, A. N. obično prosi ispred Poslovnog centra u Vitezu, a od Midhete Đ. je pokušao oteti mobitel, koji je držala u ruci. Kada mu se Midheta suprotstavila, on je izvadio nož te djevojku ubo u vrat. Neko od slučajnih prolaznika pritrčao je u pomoć djevojci te je napadač pobjegao.

---

<sup>9</sup><http://www.sodalive.ba/izdvojeno/video-nasilje-u-lukavcu-ucenika-elektro-masinske-skole-mjesecima-maltretirali-tukli-i-pljackali/>  
<http://www.radiosarajevo.ba/novost/131667/ucenika-elektro-masinske-skole-mjesecima-maltretirali-tukli-i-pljackali-video>



THIS PROJECT IS FUNDED BY THE EUROPEAN UNION

The views expressed in this publication do not necessarily reflect the views of the European Commission



Ubrzo nakon toga pripadnici PU Vitez uhapsili su 15-godišnjeg A. N, a on im je, nakon krim-obrade, pokazao gdje je odbacio nož kojim je napao 17-godišnjakinju.

Povrijeđenoj djevojci ljeakarska pomoć je ukazana u bolnici "Dr. fra Mato Nikolić" u Novoj Bili, gdje su joj konstatovane lakše povrede. Nakon saslušanja dežurni kantonalni tužilac naredio je zadržavanje A. N.

Zvornička policija istog dana uhapsila je A. D. (14) iz Glumine zbog nanošenja teških povreda 13-godišnjoj A. B. Dječak je nakon hapšenja, u skladu sa Zakonom o zaštiti maloljetnika u postupanju s djecom i maloljetnicima u krivičnom postupku, saslušan u prisustvu roditelja, branioca i socijalnog radnika. Tom prilikom priznao je da je kamenom izudarao djevojčicu, a nadležni tužilac je naložio da se uputi na psihijatrijski pregled na Odjeljenju za mentalno zdravlje u zvorničkoj bolnici. Dječak je nakon toga upućen u banjalučku bolnicu, odnosno dječiju kliniku, radi pregleda i liječenja. Motiv napada zasad nije poznat.

### **Brutalno pretučena**

Kako se moglo saznati, A. B. se u utorak navečer nije vratila iz škole, a nedugo nakon što su policiji prijavili da im nema kćerke, njeni roditelji su je u skoro besvjesnom stanju pronašli u Zlatnim Vodama. Na tijelu je imala više povreda nanesenih tupim predmetima. Nakon što joj je ukazana pomoć u zvorničkoj Opštoj bolnici, jer je bila u teškom posttraumatskom šoku, djevojčica je prebačena u Univerzitetско-klinički centar u Tuzli. Pregledao ju je i ginekolog te je ustanovljeno da nema tragova nasilnog seksualnog čina.

Prema riječima Dragana Cvijanovića, dežurnog hirurga u Opštoj bolnici u Zvorniku, djevojčica je brutalno pretučena, ima otok oko očiju, krvarenje iz lijevog uha, te otečene ušne školjke sa znacima unutarlobanjskog krvarenja.<sup>10</sup>

Činjenica je da je trenutna tendencija rasta maloljetničke delinkvencije veliki društveni problem, koji kod većine građana stvara osjećaj nesigurnosti i zabrinutosti. Sve dok nadležni organi jasno ne percipiraju neminovnu spregu zakonodavstva, prevencije, alternativnih mjera, institucionalnog tretmana, primjene krivičnog zakonodavstva za maloljetnike u praksi, kao i održivog sistema podrške u strateškom tretiranju problematike maloljetničke delinkvencije, teško možemo govoriti o sistemskom rješavanju problema. Ali, bez sumnje, i građani imaju svoju ulogu, koju je potrebno naglašavati kako bi se pozicija pasivnog posmatrača zamijenila statusom aktivnog učesnika. Ovo iz razloga kako bismo svi skupa uživali visok stepen stanja bezbjednosti u vezi s ponašanjem maloljetnika, odnosno pojavama devijantnosti u njihovom ponašanju.

***Tuzla, januar 2014.***

***ORC Tuzla tim***

<sup>10</sup> <http://www.oslobodjenje.ba/crna-hronika/maloljetnicko-nasilje-djevojku-ubozem-u-vrat-zbog-mobitela>



THIS PROJECT IS FUNDED BY THE EUROPEAN UNION

The views expressed in this publication do not necessarily reflect the views of the European Commission

